



Progetu finantziau cun su dinai de sa Regione Autònoma de Sardigna cunformas a sa L. 482/99 e a sa L.R. 22/2018

## Sa truma de is mortus

Fiat una noti de cabudanni, sa festa de Santu Pàulu de Monti fiat acabada, e is sartus fiant citius, non s'intendiat signu perunu de vida. Un'òmini cun su fosili apicau in su tzugu fiat atressendu in unu sartu innui s'agatàt una crèsia, totu in unu nci stupat de unu cugutzu unu sirboni ca si ponit a curri a ingìriu de sa crèsia. S'òmini, prontu, ddu sparat e dd'ocit.

Po sighiri su caminu suu tocàt a passai in unu utureddu chi passàt in antis de sa crèsia, s'òmini nci fiat passau, ma pròpriu candu fiat passendi innantis a s'eca de sa crèsia at intèndiu custus cantus e custa genti arriendi chi arribànt de aintru de sa crèsia.

Si firmat po ascurtai mellus e intantis pentzat intre issu etotu:

- Cun custu sirboni cassau e cun totu custa genti prexada e in festa estus a podi apariciai unu festinu e potzu torrai a parti cras a mengianu;

E narendu custu fiat caminendu cun su sirboni tira-tira e fiat intrau in crèsia cun su sirboni mortu.

Innoi iat agatau unu cìrculu de pantasmas a forma de òminis ca dd'iat acòlliu cun prexu circhendu in dònna modu de ddu ponni in mesu a su cìrculu.

Cust'òmini fiat spantau meda e si ndi fiat atzicau candu in mesu de custus pantasmas iat connotu unu gopai de batiàriu ca si ndi fiat stacau de is àteras ànimas, si fiat acostau a issu e dd'iat nau:

- Saludi gopai, fustei est in mesu a is ànimas de is mortus e chi non fadeit de totu po ndi bessiri de mesu, cras at a essi fustei puru in paris a is mortus; deo perou ca s'apu donau sa fidi in vida s'apa a sarvai de sa morti.

Fustei brintit in mesu a nosu a baddai ma candu arribaus a su prus bellu cantai custa cantzoni:

*“Cantai e baddai bosàterus*

*Ca imui sa festa est bòstra*

*Candu at a benni sa nosta*

*Cantaus e baddaus nosu”*

Issu ascurtat is cunsillus de su gopai e si ponit in mesu, ma in su prus bellu incumentzat a cantai is versus e totus ascurtant spantaus e si ponint a arriri, si nci ghetant a terra e si pistant.

Issu nd’aprofitat de custu carraxu, bessit a foras, pigat su cuaddu ca iat lassau acapiu, bessit e currit.

Is mortus apenas si ndi funt acataus bessint issus puru a foras e incumentzant a curri avatu ma non nci-dd’ant fata a ddu cassai.